

SAN MARTIN Y LUNGIARÜ

Mësses a Oies: mertesc, mercui y jöbia dales 20.00, vëndres y sabeda dales 16.00.

Le Vësko Ivo Muser inviëia al **peregrinaje diozejan a Weißenstein** la sabeda, ai 30 de ma; al pëia ia deplü prozesciuns dai paisc incëria che s'abina a mëssa dales 15.00.

Cotan de jogn dla Val Badia va en Pasca de má (22-25/05) ala **festa di jogn a Salzburg** sot al motto „Neues Feuer braucht das Land“. I inviun chi che stá a cíasa da ciaré vigni tant sot a www.loretto.at por odëi ci ch'al vëgn fat, y gní impara n ater ann!

La **Uniun dles porsones vëdues y sores** inviëia al peregrinaje al santuar Valcalda a Pieve de Cadore en jöbia ai 28 de ma. Anunziesse cina ai 25 de ma: 0474 590 069.

SAN MARTIN

I ciafëis tl'injunta le **decunt dles entrades y dles spëises dla ploania dl ann 2014**, y al vëgn indô dër bel invië da paié indô le contribut por la cöra. Le contribut é de 40 euro por vigni porsona che à compli 18 agn, tué fora i studënc. I contribué é da paié ite tla banca o incé por Online Banking; IBAN: IT 11 J 08010 58830 000304004922.

Dé di Seniors da San Martin y Antermëia en sabeda, ai 30 de ma a San Martin che mët man dales 10.00 cun n pinsier religiùs te dlijia, dedô spazirada por le tru de meditaziun cina jö dal lech de Vistles, dailó pice aperitif y griliada por düc. Cost 15 € a porsona. Info y prenotaziuns cina en domënia, 24 de ma: por S. Martin pro Alfred 333 36 54 786 o Gotti 328 64 72 341 / por Antermëia pro Maria 0474 520 107.

Peregrinaje a Riffian/Maran organisé dal KVV da San Martin en dedemesaledema, ai 3 de jügn. An pëia ia dales 7.00 sön plaza da San Martin; marëna tl Restaurant Trauttmansdorff y dedô vijita al urt. Iade, marëna y entrada costa 40 € por i scric ite al KVV y 43 € por i atri. Info y prenotaziuns cina al 1 de jügn pro Hilda 0474 523 133.

LUNGIARÜ

La **Uniun di Seniors da Lungiarü** inviëia düc i seniors a na jita en sabeda ai 23 de ma a Maria Waldrast / Matrei am Brenner. I piun ia da Lungiarü cun na coriera dales 7.30 che nes condüj a Maria Waldrast y spo tla Val de Stubai a marëna y dedô söla fossa de siur Stachio Clara da Balzé. I rovarun a cíasa dales 18.00 ia. Le cost é de 10 euro por la coriera plü la marëna che vignun se paia instës. Prenotaziuns: Annelies 0474 590 067 (da misdë) cina en jöbia ai 21 de ma.

La **Uniun dles Patrones** organisëia ia por l'isté cënes ladines. I s'incuntun en sabeda ai 23 de má, do mëssa tla scora da Lungiarü. Dötes les patrones che á interes da tó pert é dër bel inviades.

Incö, 17 de ma, é i museums de Tor y da San Ciascian daveré ales families dales 13.00 ales 18.00 (por le program ciarede tl'ultima plata).

Invit al **concert dla Musiga** da S. Martin incö domënia, 17/05, dales 20.00, tl gran salf.

Uniun dles Patrones: Por le **curs da cujiné pröms y dessert** en lönesc (18/05) dales 19.30 a Piculin tla ex scora profescionala él da s'anunzié pro la Loise 0474 590 026.

Oste fá **n'esperienza tl ciamp dles organizaziuns Non-Profit**? La Ciasa de Palsa tol d'isté studënc y studentes danter 15 y 19 agn por sorvisc de voluntariat por 6 y 8 edemes te chisc ciamps de laur: Acompagnamënt y baié cun i ghesé, aiüt tl'animaziun, aiüt tl transport intern, laurs de aministrazion, aiüt pro i laurs da verdaciasa, aiüt pro i laurs de economia dla ciasa. Ala fin ciafa i voluntars na retüda de 80 € netto al'edema de laur. Info 0474 524786. Co fá domanda ciarede sot a www.ciasadepalsa.it; da dé jö cina les 12.00 di 27 de ma ti ofizi dla Ciasa de Palsa.

Raiun Sozial Val Badia: dai 26 de ma inant saral vigni dedolönesc dales 15.00 ales 17.00 tla 3ª alzada dl Raiun Sozial a Picolin le **Patronat dl Sindacat Sgb Cisl** che ti píta ala jënt la poscibilité de lascé fá la EEEVE che öga por domandes de contribut.



internet: www.valbadiaonline.com

Plata dles Ploanies San Martin y Lungiarü

siur **Iaco Ploner** 333 48 32 765 / 0474 453 003 - ploner.jakob@aruba.it
redaziun: anton.gasser@rolmail.net - 348 27 44 517 / 0474 523 194

17.05 - 24.05.2015 nr. 25

termo da publiché: jöbia 20.00
radio: 90,40 / 93,70



ASCENSIUN DL SIGNUR (Assënza/Palsacrusc)

Vangele: Merch 16,15-20

Jide fora te döt le monn,
y incundedi le vagnele a dötes les creatöres!
Chël che creï y se lascia batié vëgn salvè,
Mo chël che ne creï nia vëgn condanè.
Y tres chi, che é rovà a creïe,
sozedaral chisc sëgn:

Do che Gejù, le Signur, ti à albü dit chësc,
él gnü tut sö tl cil y s'á sentè a man dërta de Dî.

Èi deperpo é pià ia y pordicâ indlunch.

Le Signur i sostignî y confermâ l'incundaziun tres sëgn ch'al lasciâ sozede.

Che s'interessëia pa incö ciamó por le cil? Impó unse datrai sentimënc olach'i dijun: Chësc é propi n paraisc! I oressun ion avèi le cil sön chësta tera. Mo cun döt ci che la jënt s'á dé da fá, n'ëra nia ciamó garatada. La consolaziun dl paraisc ia tl ater monn é n sciampé dala realté - insciö ti vëgnel trat dant al cristianejim. Impó oress bëgn scialdi düc rovè a na contentëza zënza fin.

Che é pa bugn da tó ite le cil sön chësta tera? Degun ater co Gejù Crist. Cun l'Ascensiun a cil é Gejù jü derevers te chël post da olach'al é gnü, da Chël Bel Dî. Èl che é Fi de Dî é gnü por nes ester dlungia sciöche n fre. Al é la pert umana dl müs de Dî. Chël che incuntâ Gejù, sintî la vijinanza y l'amur de Dî, ciafâ varijun y pordonn, speranza y pesc.

La presënza de Gejù ne se röia nia cun l'ascensiun a cil; al vir inant te na maniera nöia. Al n'é nia plü lié al tëm y al post, mo al é presënt olache sù discepuï operëia y s'abina. Al vëgn cun nos y i podun l'incunté indlunch y tres. Le cil n'é nia n post lassö o cajö, al é dailó olache Idî vir, olach'al sozed süa orenté, olach'al regnëia süa pesc, olach'al flada so Spirit.

Ara stá a nos da chirí le cil te nosta vita da vigni dé y da jí por le tru de Gejù, che nes condüj ala contentëza zënza fin pro Chël Bel Dî.



	SAN MARTIN		LUNGIARÜ
17.05.15 ASCENSIUN DL SIGNUR Assënza / Palsacrusc	9.00 Corona de ma 9.30 Gran Mëssa dla comunité 19.30 Corona de mà sö Ju	17.05.15 Domënia	7.55 Corona de ma 8.15 Gran Mëssa dla comunité 15.00 Corona tla Capela da Seres
18.05.15 Lönesc <i>Jan I., Felix, Erich</i>	19.30 Corona de ma a Picolin	18.05.15 Lönesc	20.00 Corona de ma tla capela da Seres
19.05.15 Dedolönesc <i>Ivo, Zelestin V., Kuno</i>	19.30 Mëssa aniv. Pire Sorà + Helmut Dejaco (aniv.) + Maria Unterweger + Mariangel Tavella	19.05.15 Mertesc	7.30 Corona de ma
20.05.15 Dedemesaledema <i>Bernardin, Elfriede, Valeria, Josefa</i>	19.30 Corona de ma a Bioch 20.00 Corona de ma sö Mirí	20.05.15 Mercui	19.30 Mëssa + Vito Clara + Franz Frenademez, Fúcia <i>dedô</i> Sentada dl Consëi de Cöra
21.05.15 Jöbia <i>Hermann Josef, Christofer</i>	7.30 Mëssa + en onú de Sant Antone abat + Franz Frenner + Vico y Bino Pedevilla Corona por vocaziuns	21.05.15 Jöbia	20.00 Corona de ma fora dala Grota
22.05.15 Vëndres <i>Rita da Cascia, Renata</i>	19.00 Adoraziun chîta 19.30 Zelebrazium dla Parora de Dî	22.05.15 Vëndres	7.30 Mëssa + Paul Mischi + Matí Clara + + Luigi, Maria, Anna y Paul Chiusura
23.05.15 Sabeda <i>Berto, Desider</i>	18.00 Corona de ma 18.30 Mëssa prefestia de rengraziamënt do intenziun aniv. Paul Vantsch + Nane Zingerle	23.05.15 Sabeda	20.00 Mëssa prefestia a d'intenz. de Clemente Clara, Oriana + Davide Daporta + + Teresa y Ignazio Pezzei
24.05.15 PASCA DE MA	9.30 Mëssa solëna dla comunité 14.00 Bato de Peter Sorà 19.00 Ora d'adoraziun al Spirit Sant	24.05.15 Domënia	7.55 Pröma pert adoraziun 8.15 Gran Mëssa dla comunité <i>dedô</i> Secunda pert adoraziun 11.00 Bato de Lisa Rungger 15.00 Corona tla Capela da Seres